

Concierto Dominical “Donny Laclé” diadomingo awor cu

Programa special pa Hubert Booi

E Concierto Dominical “Donny Laclé” di diadomingo dia 26 di juli awor na “The French Steak House” di Manchebo Beach Resort & Spa lo ta un concierto masha special. E concierto aki ta un homenahe na señor Hubert (Lio) Booi cu ta celebra e bunita edad di 90 aña.

Lio Booi ta un persona multifacetico, conoci y aprecia pa su poesia-, storia- y canticanan pa grandi y chikito.

Lio a nace na Bonaire dia 25 di juli 1919 y for di 1937 e ta biba na Aruba. For di dia cu el a pone pia riba suela di Aruba, el a demostra su aprecio pa e isla aki cu su hendenan y su cultura.

Prueba di esey ta su aporte grandi na nos himno “Aruba dushi tera”: E di tres couplet ta su inspiracion: “*Grandesa di bo pueblo ta su gran cordialidad. Cu Dios por guia y conserva su amor pa libertad.*”

Lio Booi tin diferente publicacion literario na su nomber, entre otro “*Golgotha*” publica na 1967 den “Antilliaanse Cahiers”, “*Muchila*” publica na 1969 y *E Flamingo di Aruba*” publica na 2006. Y ken no ta corda e exito grandi di su obranan musical “*E perla di Caribe*” di 1955 y “*Amor di Kibaima*” di 1969?

E prome parti di e programa di e diadomingo aki ta consisti di

un homenahe na Lio di parti di famia Booi. Entre otro su yiu muher Ludwina Booi, residencia na Hulanda, ta aporta cu su bos y su guitarra, su nieto Jurgen Booi ta toca algun piesa riba piano y su nuera Vicky Booi tin un dedicacion special.

Pa 12.00 or lo tin un sorpresa masha grandi, ora un orkesta y coro bao di direccion di señor Bartholomeus (Roy) Sneek subi escenario pa pone enfasis riba e merito musical di señor Hubert Booi.

E Fundacion pa Talento Musical cu ta organisa Concierto Dominical ta duna señor Hubert Booi, cu tambe ta forma parti di e fundacion aki, for di awor

caba un caluroso pabien y ta dese’e hopi aña mas cu nos.

Nos ta invita tur e bishitantenan fiel di Concierto Dominical y henter pueblo di Aruba pa ta presente dia 26 di juli.

E concierto ta cuminsa exactamente 11.00 or di mainta y ta

dura te 13.00 or. Ta recomendable pa yega tempran pa haya un bon lugar.

Entrada ta gratis, pero semper por haci un donacion pa e fundacion por sigui yuda nos hobennan talentoso riba tereno di musica.